

COMUNICATO n. 2336 del 10/08/2026

Marchiori: “Ber gem ompòrt en de noat va haus ont ber versichern paitrong”. Vort galeik vinf milionen va euro. De vrong va paitrog va de 24 van agest finz as de 12 van schanmikeal 2026

Laichter vonenpau: kritern ont vorm ver de paitrong ver ber as ausrichtet haiser ver za verzinsn

[Mòcheno] Naia mittln ont vorm ver za understitzn za richtn aus ont vermearern de haiser za verzinsn en vrainmòrk en de familia as noat hom van an haus. De Provinzaljunta bail der trèff van vraita as de 7 van agest hòt u’ganommen - no de vourtschbinn van assessor ver de politik ver en haus Simone Marchiori - de kritern ver za gem paitrong abia verliargèlt en de sèlln as ausrichten de aigene haiser ver za verzinsn sa, s hòt zuazoln ver 5 milionen va euro.

«Pet de doi mosnem bill ber gem bèrt en a hilf as de doi amministrazion stòrch gabellt hòt ver za meing kennen gem mear haiser za verzinsn, s ist drinn kemmen galeik en stabilitetgasetz 2026 ver za gem ompòrt en de bea’ne haiser as meing kemmen verzinst ont asou minder lara haiser hom - de doin de beirter van assessor Marchiori-. Der inser zil ist der sèll za understitzn s bider leing as n mòrk de nain haiser za verzinsn pet an nider prais en de familie as noat hom ont as nèt guat sai’ za vinnen a haus, gem sicherkaitn ont hilf en bem as hòt haiser za richtn aus ont as sai’ kemmen verzinst lai ver kurza zaitn. En de naiekett ist gor de moglechtket ver bem as kriak der paitrog, za tshèrln aloa’ zbischn de lait as hom noat van haus en bem zinsn.

De ausrot as ist kemmen u’ganomment shauk en artikl 61-bis van provinzialgasetz 21/1992 (Regln ver de provinzialprojektn ver de Laichter vonenpau), innganommen van provinzialgasetz va stabilitet 2026: en doi artikl hòt s a naiekett, as ist ver za zuazoln de òrbetn ver za ausrichtn de haiser za zinsn enviretrong va lait. S doi billt song as men gip an paitrog en konto kapital gor ver privatn as billn ausrichtn sainege haiser ont gem en zins en lait as hom noat van a haus.

Pe de doi mosnem kemmen tschrim de kritern, ber as mu’ ont abia kring der paitrog.

Ber kòntt vourstelln a vrog

De vroger miasn hom a haus, gor o’toalt, en de eirter va de Provinz va Trea’t.

Òrbetn as men kòntt vrong der paitrog

De òrbetn va ausrichtn miasn kostn nèt minder as 15.000 euro ont nèt mear as 50.000 euro ver an iats haus. Benn as sai’ garift de òrbetn, de haiser barn miasn drinn sai’ en de katastalkategori van A/2 finz en A/7.

Biavle as bart sai’ der paitrog ont nou òndra zuazoln

Der paitrog ist gem en konto kapitale ont ist der 50% van kost as kòntt sai’ innganommen. Der kòntt sai’ mear ver òndra 5.000 euro ver an iats haus en de doin vòlln:

1. Benn s der vroger mòcht se hèlven van innrichtn as nèt verean as òrbetn ver za hèlven de lait as hom noat van a haus, oder gemen de haiser as sai' kemmen ausgarichtet;
2. Benn s haus as kimp ausgarichtn kimp nea' mer gem en zins ver a kurza zait.

Abia as kemmen tschèrlt de lait as gea' drinn en zins

Ver za tschernen de lait as noat hom van a haus za verzinsn, de sèlln as krieg der paitrog hom zboa moglechkaitn:

1. Direkt tschèrl: de sèlln as krieg der paitrog meing sèlber tschernen de lait as nemmen en zins. De doin miasn nèt pauer sai' van a haus as steat as minder abia 40 kilometre vèrr van sèll as de tea' verzinsn;
2. Tschèrl durch de innrichtn as nèt verdean; en doi vòll, de sèlln as krieg der paitrog meing vrong hilf en de dinsnt as kemmen gem van innrichtn as nèt gabingen ont as òrbetn ver za hèlven de lait as noat hom, asou za meing gem de haiser as sai' kemmen ausgarichtet.

Ver en sèll as keart der zins, en de zòmmpint barts kemmen ganidert van 15% der zins asou abia as paschraip de ausrot va de Provinzaljunta n. 1060 va de 10 van heibeger 2026.

Zaitn ver za vourstelln de vrong

De vrong ver za krieg der paitrog barn kemmen vourstellt va de 24 van agest 2026 finz as de 12 van schanmikeal 2026.

Der paitrog bart kemmen gem no en de zaitn as kemmen vourstellt de vrong finz benn as men hòt ganua gèlt.

Ver en zuazol van vrong va paitrog, de Provinz va Trea't hòt vort galeik ver en 2026, 5 milionen va euro.

Ibersetz gamòcht van Sprochtirl va de Tolgamoaschòft Hoa Valzegu' ont Bersntol

(cdt)